



- Tate, ven di corse, a si petin!

- Cui? Cui si petie?

Un cjalon ator pal bearç, ducj i fruts di cjase a jerin li che a pesseavin a cori daûr di Romeo che al jere vignût a clamâ so pari, ven svelt!

Ma se no son i nestris che a si barufin, cui isal? I lor amîs, chei mieçs piavots? Ma alore ce jentrio jo?

In chel stes timp, di chê altre bande de strade:

- Papà, vien svelto, i si pesta!

- Chi? Cui si pestie?

No jerin i siei fruts che a si pestavin, ducj i siei a jerin li che a tacavin a cori daûr di Flavio che al jere vignût a clamâ il pari par vie che...

Bepe e 'Sef e jerin nassûts ducj i doi inta chel an, il 1893. A vevin fate la vuere, ducj i doi. Un di une bande, un di chê altre. Cumò a jerin a stâ dongje. Che Bepe, sô fie e veve maridât un furlan e si veve strissinât daûr il pari inta chel paîs austro-ungaric de basse furlane. I lor fruts daspes a si imberdeavin cu lis lenghis e i fevelavin furlan al nono e piavot al pari. Lino, il nevôt di 'Sef, furlan, in chê dì, al veve otignût un grant onôr dal nono: i veve lassât meti sù il so elmet austro-ungaric, un cemeli che il vieli lu tignive strent, orgoiôs che nissun sa. E Lino, dut braurôs, al jere lât a zuiâ lì dai siei amîs.

Bepe, al viot chest frut cun chê robe sul cjâf, al cognòs l'elmet e nol pues tasê:

- Dove te va ti con quel bocâl in testa?

Lino a cjase i conte al nono, sâstu ce che al mi **dîs** il nono di Romeo? Cussì e cussì.

'Sef, furlan soldât di Franz Joseph, nol pues gloti une tâl insolence cuintri l'Imperi, l'Imperadôr, la storie grande e la storie sô piçule personâl.

Velu che al è za lì dal piavot.

- Ce âstu dit?

- Mi?

- Tu, sì. Ce âstu dit al frut?

- Go dito che ...la verità go dito!

Peraulis. Peraulatis. Peraulonis di ghise. Un sburton. Une talpassade. Une pidade. Un sgarnof. Sanc di nâs, un lavri rot, grombulis.

I fîs a àn scugnût cori a clamâ i paris, che a àn scugnût cori a disseparâ i vons, juste in timp par evità che, cu la scuse di un bocâl (che nancje nol jere un bocâl) no ves di vignî a sclopâ la Tierce Vuere mondial.

***di Laurin Zuan Nardin***